

Governu Aprova Ona Ohin Pakote Estímulu Forte Ida Hodi Jere Risku Ekonómiku No Finanseiru Sira Husi Koronavírus

Dili, loron 17 fulan-abríl 2020: Ohin, Komisaun Interministeriál Kombate COVID-19 nian aprova ona pakote estímulu no resposta ekonómika ida hodi kombate efeitu negativu sira ne'ebé bele mai husi koronavirus ba ekonomia. Governu sei ezekuta rekursu fiskál no monetáriu sira ne'ebé presiza hodi garante, lalais, katak ekonomia bele la'o nafatin durante krize koronavirus. Sai hanesan prioridade nasional ida, fó resposta ba kustu no implikasaun husi xoke ekonómiku ida, ba períodu ida ho durasaun fulan tolu, hahú husi fulan-maiu to'o fulan-jullu, atu nune'e ema sira ne'ebé afetadu husi efeitu negativu ne'e bele hetan protesaun iha situasaun ne'ebé lakon rendimento no dezempregu, no atu empreza sira ne'ebé hasoru difikuldade sira bele sustenta sira nia fluksu kaixa nian no atividade ekonómica.

Bainhira laiha resposta ne'ebé forte no lais, restrisaun sira husi distansiamentu sosiál no emergénsia sanitária prejudika daudaun kadeia abastesimentu nian, sei aumenta dezempregu, hamenus rendimento no sei ameasa ita-nia atividade ekonómica. Depende ba emergénsia sanitária ne'e sei dura to'o bainhira, projesaun ba tinan 2020 hatudu katak kada uma-kain média sira bele lakon sira-nia rendimento husi \$170 to'o \$670. Ida-ne'e bele halo ita-nia sidadaun sira ne'ebé vulneravel liu sai mukit no kuran ai-han.

Tanba ne'e maka, Governu Konstitusionál VIII identifika ona medida estratéjika 19, atu implementa lalais, hodi fó tulun ba família no empreza sira iha tempu susar ida-ne'e, hodi hamenus impaktu ekonómiku husi emergénsia sanitária nian. Estímulu ekonómiku ne'ebé aprova ona ohin loron ne'e ninia objetivu maka proteje ema, salva empregu sira, sustenta konsumu no ajuda atividade sira setór privadu nian.

Hanesan saida maka ohin deside ona, Governu sei implementa sistema universál ida kona-ba transferénsia osan, ne'ebé sei garante rendimento báziku mensál ba uma-kain 214.000 resin. Hein katak medida ne'e dura fulan tolu nia laran. Governu mós sei fó subsídui ba pagamentu ba funzionáriu sira husi setór formál ne'ebé hela iha karantina ka iha uma durante pandemia ne'e, ho governu sei fó kontribuisaun to'o 60% husi kustu salariál. Ne'e sei estabiliza empregu no sei permite empreza sira hodi kontinua fó serbisu ba sira-nia traballadór esensiál sira.

Aleinde ne'e, Governu sei sosa foos emergénsia ba fulan tolu atubele kompenza bainhira foos menus durante pandemia ne'e. Governu mós sei fornese subsídui atu garante konektividade. Aviaun Air North sei kontinua semo ba mai semana ida dala tolu, hodi fornese ligasaun médica no emergénsia ne'ebé importante ba Darwin. Governu mós sei fó subsídui ba transporte marítimu merkadoria nian ba mai Atauru no Oekusi no sei extende deskarga iha portu marítimu durante oras 24 nia-laran. Ida-ne'e sei evita atrazu sira iha distribuisaun abastesimentu esensiál sira.

Governu mós sei fó pulsa gratuita (\$15 kada fulan) ba eletrisidade. Bee-moos mós sei gratuita, pagamentu ba kontribuisaun seguransa sosiál (tantu husi traballadór nune'e mós funzionáriu públiku), no mós aluga propriedade Estadu nian sei laiha. Medida hirak ne'e inklui programa krédito lubuk ida ho osan-funan ki'ik, garantia krédito ba importadór sasán esensiál sira no empréstimu emergénsia nian, atu evita falénsia, atu mantein empreza sira loke nafatin no atu apoia família sira hodi resolve sira-nia difikuldade finanseira.

Governu sei implementa programa atu aumenta oferta ai-han iha parte Tasi Mane no Vikeke, no garante disponibilidade fatór produsaun agrícola, pekuáriu no peska nian. Aleinde ne'e, sei fó mós subsídui ba estudante timoroan hamutuk 4.200 ne'ebé hela iha rai-li'ur, ne'ebé iha hela situasaun difisil nia-laran, enkuantu estudante timoroan sira ne'ebé estuda iha rai-laran sei hetan subsídui internet gratuita atu estuda liuhusi sistema on-line. Ikusliu, sei dezenvolve sistema online ba akompañamentu kazu COVID-19 nian sira.

Kustu totál sei proporsionál ba impaktu emergénsia sanitária nian no medida ekonómika sira sei dinâmika no sei ajusta nafatin durante impaktu ekonómiku ne'e.

Timor-Leste iha pozisaun ne'ebé maka forte atu fó resposta política ekonómika ida ne'ebé forte atu jere risku ekonómiku no finanseiru husi koronavirus. Pakote estímulu ekonómiku ne'e nu'udar asaun extraordinária atu hamenus xoke ekonómiku COVID-19 nian ne'ebé fó ameasa no sei kompenza nesesiade kona-ba finansiamentu, problema sira ne'ebé liga ba likidés no défise rendimento nian, nune'e uma-kain sira, empreza, grupu no indivíduu sira-ne'ebé ne'ebé vulneravel liu iha sosiedade bele moris nafatin iha tempu inserteza nian ida-ne'e. **HOTU**